

BONNETE

 Kea leboha, moena. Kea leboha, Moena Hoekstra.

Lumelang mantsiboea ana, ho ea Houston. Ruri ke nka ona e le monyetla o moholo, ho fihla mona hape bosiung bona ho Houston. E se e le lilemo tse ngata ke fumane monyetla oa ho ba mona. 'Me esale ke lutse, ke mametse e mong le e mong oa libui tsena bosiung bona.

² 'Me tsatsi le leng, ha ke hlophositse mabapi le ho hong, sebakeng se seng, 'me ka tseba bana bao ba tobane le lefu, ka nahana, "Ha ntho e ka hlahela bana bao, nke ke ka itšoarela le ka mohla," ka ho se tle mona ho hlahisa mohopolo oa ka le ho etsa sohle seo nka se khonang, ho thusa 'mè enoa le ntate, ba bana bana, le ho etsa sohle seo nka se khonang ho pholosa maphelo a bona.

³ 'Me Houston e na le...ke tulo ea sehopotso ho 'na. E na le mehopolo e mengata e monate eo ke e bolokileng ho tloha ha ke qala ketelo ea ka mona lilemong tse ngata tse fetileng, mona ho fihla Herald Of Faith, Moena Kidson, le tlase mona odotoriamong mohla ke neng ke le mona le Moena Raymond Richey le bareri ba motse.

⁴ 'Me hape, ehlile, Mongh. Ayers, Mongh. Kipperman, bosiung boo k'hamera e pakang ke sa bue letho le phoso. E ne e le 'Nete. 'Me eitseha leihlo la mochini la khamera le qhautsa pono ea... kapa, e seng pono; bonneta. Kreste eo re mo rerang le ho mo rata, o ne a ena le rona, hore O tšepisitse ho ba le rona, 'me k'hamera e ile ea nka setšoantšo sa Hae. Hangata ke buile, mehleng e fetileng, hore—hore ke ne ke bona Leseli leo ka linako tsohle. Empa ka linako tse ling batho ba ka batla ba Le belaela, etsoe le ka lumela ba ka ba joalo, empa bosiung boo ea e kholisa. E le khetlo la pele Le kileng la nkuoa.

⁵ Ho tloha mohlang oo, Le se le nkiloe makhetlo a 'maloa. Koana Jeremane haufinyane feela, ho theoha, mohla tlolo e neng e le teng, le mohla Le ne le khutla hape. 'Me lintho tseo ha li a etsetsoa ho holisa motho ea itseng, empa ke ho netefatsa Boteng ba Jesu Kreste har'a batho ba Hae.

⁶ 'Me re lumela Morena Jesu eo a le teng mona bosiung bona, ho re thusa nyeoeng ena. 'Me ke lumela A e thahasella ho feta kamoo re ka bang kateng. 'Me ruri ke utloela batsoali ba bana bohloko, le ho ema lehetla-ka-lehetla le monna e mong le e mong le mosali ea lekang ho ba loela litleneng tsa lefu.

⁷ 'Me, joale, ke utloisia hore sena ha se kopano ea tsoseletso, e mpa e le e—e letoto la likopano tsa thapelo le tšoareloang meeaa

ena e robetseng meriting ea lefu. 'Me ke siiloe ke nako. Nke ke ka bua halelele.

⁸ Empa ke rata ho ntša thero, kapa mohlolithero, ke rialo, ho tsoa ho mohlolithero oo ke ratang ho o bala libakeng tse peli Lengolong. 'Me lona ba tšoereng Libibele, ha le ka phetla le 'na nakoana feela, ho Buka ea Bafilipi, khaolo ea 1, le temana ea 20 ea khaolo ea 1 ea Bafilipi.

Ka tebello e tieang ea ka le ka litšepo ea ka, hore nke ke ka soaba ka letho, empa...ka sebete sohle, joalo ka kamehla, le joale Kreste o tla holisetsoa 'meleng oa ka, leha e ka ba...bophelo, kapa...lefu.

⁹ 'Me hape koana, hape, Bukeng ea Liketso, khaolo ea 2 le temana ea 30. Nka bala ea 25 ho haola ka ea 30.

Hobane Davida ha a 'moletsse o itse, hoba ke bone Morena kamehla pel'a sefahleho sa ka, hobane o letsohong la ka le letona, ke tle ke se ke ka sisinyeha:

Pelō ea ka e thabile ke hona, le leleme la ka le nyakaletse; esita le eona nama ea ka e tla phomola ka tšepo:

Hobane nke ke ka tlohela moea oa ka liheleng, nke ke ka lesa Mokhethoa oa hao hore a bone ho bola.

U se o ntsebisitse tsela ea bophelo; u tlo nkhoris ka thabo e tsoang lifahlehang sa hao.

Banna ba heso, ha nke ke le bolelle phatlalatsa hore mopatriareka Davida, hore o shoele a ba a patoa, 'me lebitla la hae le sa ntse le le teng har'a rōna hofihlela letsatsi lena.

Ka baka leo ka ho ba moporofeta, le ka ho tseba hobane Molimo o mo hlapantsitse ka kano, e reng ka tholoana ea letheka la hae, ka nama, o tla tsosa Kreste ho lula teroneng ea hae;

Ka ho iponela hoo pele o buile ka tsoho ea Kreste, moea oa hae o ke ke oa tloheloa liheleng, le joalo nama ea hae ha ea bona ho bola.

¹⁰ Ha re inamiseng lihlooho tsa rōna nakoana bakeng sa thapelo.

¹¹ Ntata rōna oa Leholumō, re motlotlo ho Uena ka mohau. 'Me ke 'nete, Morena, lebaka leo re leng mona bosius bona, ke ho kopa mohau. Re ne re sa tl'o kopa sena hola re se na tumelo ea ho lumela hoba re tla e neoa. Banna ba phalletse naheng ka bopphara, le lithapelo li ntse li nyoloha hohle, ho Uena, hore maphelo a bana bao re ba rapellang ka tjantjello bosius bona a tle a bolokehe. Morena, re kōpa matla ho bommè le bontate ba bacha bana.

¹² 'Me ha re utloisia, hore, mohlankana enoa o neile Uena bophelo ba hae 'me o batla ho U sebeletsa. 'Me ha re utloa e mong oa libui a bua, a re, o ne a batlile ho ba mosebeletsi oa Evangel, Ke a rapela, Molimo, hore U tle o abele mohlankana enoa monyetla.

¹³ Re tšoarele libe tsa rōna, hloekisa lipelō tsa rōna mehopolong e mebe, le eng e ka bang tseleng ea rōna e ka sitisang thapelo ea rōna ho arabelloa batho bana.

¹⁴ Joalo ka ha re balile Lentsoe la Hau, re a tseba maholimo le lefatše li tla feta empa Lentsoe la Hau le ke ke la hloleha. Re U rapela ho ekeletsa ho rona, ka Moea o Halalelang, ther e ka ntšang, e ka bang thato ea Hau e Khethehileng nyeoeng ena joale, joaloka ha re utloile 'muelli le bongata bo bua. 'Me re rapela hore re tle re fumane feela se ka etsoang khetlo le latelang, khato ea rōna e latelang ke efe. Morena, re mona ho e phethisa. Re tsebise eona, Morena, ka Lentsoe la Hau. Hoba re e kopa ka Lebitso la Mora oa Hau, Morena Jesu. Amen.

¹⁵ Ho bala litemana tse 'maloa tsena, 'me kea elelloa hobane ketsahalo e khōlō, hobane e a ngongorehisa. Nka nahana, ha ke ne ke utloa 'me ke fumana thelekramo eo ea 'mè, "Ho ka thoeng haeba e ne e le mora oa ka ea lutseng moleng oo, kapa morali oa ka?" 'Me ke... Re batla ho kenya sohle seo re ka se khonang ho eona.

¹⁶ Ebe ba bang ba re, "Be, e ne e le karoloana ea Lentsoe feela, eo u e balileng, Moena Branham." Be, hoo e ka ba 'nete, hape. Empa, u a bona, ha se e—e boholo, kapa mantsoe a mangata. Ke seo e se bolelang. Ke—ke feela... Seo e leng sona, ke tsepiso ea Molimo.

¹⁷ 'Me ke batla ho ntša bosiung bona, mohlolitherong ona bosiung bona, kapa ther o tsoa mona: *Bonnate*.

¹⁸ Ke khethile sehlooho sena, nakoana e fetileng, ke lutse phaposing ea ka ea motele, hobane ke nahana hore joale re hloka ntho e 'ngoe ea sebele, bonnate boo re ka itšoarellang ka bona le ho tseba hore ke 'nete. Horeng ea pitlahano tjena, re tšoanelia ho tšoara ntho ea makhonthe, e lokileng, ntho eo re ka itšoarellang ho eona, ho tseba hore na, kamoo nyoe e tsamaeang kateng.

¹⁹ Joale, ho latela—ho Webster, *bonnate* ka bobona, ke "e se nang moeli matleng a eona," 'me sethatong ke "makhaolakhang." 'Me makhaolakhang ke "amen." Ke bonnate. Joaloka seo e... Eo ke pheletso. Ke ntho e 'ngoe le e 'ngoe.

²⁰ Joale, katleho e 'ngoe le e 'ngoe e kholo e kileng ea finyelloa lefatšeng, e tlameletsoe ho bonnate ba mofuta. U ke ke ua etsa letho u sa itšoarelle ka ho hong.

²¹ Ha mohlankana a nyala mosetsana, o tšoanelia ho tseba semelo sa mosetsana enoa. Kapa mosali e mocha o tšoanelia ho tseba semelo sa mohlankana, seo a ka itšoarellang ka sona. "Na

monna enoa e tla ba monna ea lokileng? Na ebe o tla nketsa monna oa mofuta o nepahetseng?" "Na mosali enoa o tla 'nea, bophelong, seo ke—seo ke se lebellang ho eena, botšepehi le lintho tse joalo?" 'Me e tlameha ho ba teng nqa e 'ngoe moo ba ka theang likano tsa bona—tsa bona holim'a eona, ho tseba hore ntho e teng e tlang ho itšoarella. 'Me ke ka baka leo re ba tlisang kerekeng, le Lentsoeng la Molimo, ho tlama bonneta bona.

²² Joale, Pauluse mona, joaloka ha re bona, o ne a tšoere bonneta boo a bo tiiselitseng, bophelo bohole ba hae, ka mor'a tšokoloho ea hae, bona e ne e le: bophelo boo setsi e leng Kreste! 'Me ke nqalo e kakang ho fumana bonneta: bophelo boo setsi sa bona e leng Kreste! E ne e le bophelo bo fapaneng le boo a bo phetseng ka nako e 'ngoe, hoba o itse, "Bophelo boo ke bo phelang joale," bo neng bo fapane le boo a bo phetseng.

²³ 'Me ha fihla mohla Pauluse a fumanang boiphibilelo bona bo mo tlisiseng qetong ena. Hoba, Pauluse e ne e le monna e moholo, ea matla har'a Bajuda, le e—e setsebi se seholo sa thuto ea bolumeli, empa a sa kholiseha hakaalo ka kemo ea hae. Empa ka tsatsi le leng, tseleng e theohelang Damaseka, Leseli, Topallo ea Mollo, ea theoha Leholimong. 'Me Pauluse, ka ho ba Mojuda, o ne a tseba hobane Leseli lena, Topallo ea Mollo, e ne e le Ntho, Molimo o isitseng batho ba habo Egepeta. Ba ne ba latetse Topallo ena ea Mollo. Ka hona, ka ho ba Mojuda, o itse ho Eèna, ka potlako, "Morena, U Mang?" O Mo tsebile e le "Morena," empa, "U Mang?"

²⁴ Eaba Puo e tsoa ho Topallo ea Mollo, "Ke 'Na Jesu, 'me ho thata ho uena ho raha litsenene." Ho tloha mohlang oo, Pauluse o tsebile Jehova oa Testamente ea Khale e ne e le Jesu oa e Ncha. 'Me a ba le seo a ka se tšoarang, 'me a ka ngola Buka e khôlô eo ea Baheberu joalo.

²⁵ Joale, ha uena, ha o ena le bonneta bophelong ba hau, o etsa lintho tseo ka tloaelo u ke keng ua li etsa, haholo ha o ena le bophelo boo setsi sa bona e leng Molimo. Bophelo boo setsi sa bona e leng Molimo bo etsisa motho lintho tseo ka tloaelo ba neng ba ke ke ba li etsa; tse makatsang, tse ilehang. Ke hobane'ng ha bophelo ba Mokreste bo sa tloaeleha ebile bo ileha? Ke kahobane ba shebile Lentsoe la Molimo, e batlang e le ntho e hosele le lefatše kajeno.

²⁶ Joale, re fumana likereke, 'me re na le mekhatlo, 'me re na le borapeli, oh, boholo ba eona, lefatše ho pota.

²⁷ Makhetlo a ka a supileng ho potoloha, ho tloha ke le etetse mona Houston, ke bokeletse tsebo e ngata ea melimo le litumelo tsa lefatše lena. Empa ha se seo ke buang ka sona.

²⁸ Ke bua ka bonneta, ho holehana le Kreste. Ka hona, e u etsa e—e motho ea mokhelo. U etsa lintho tse makatsang. Monahano oa hau o fapane le mohopolo oa hau oa mehleng ho hang, hoba u fumane ho hong, eo u ankorileng tumelo ho Ea bopileng

maholimo le lefatše, hoo, lona Lentsoe la Oona ka Sebele le a bopa, Molimo O bopileng lefatše ka polelo, 'me ha ho letho le ka Mo sitang. Ka hona e etsa hore u bope, ka bouena, hoba u nka Mantsoe a Hae. 'Me lentsoe ke mohopololo o hlahisoang.

²⁹ Joale, Pauluse o ne a kene maemong ao, moo a neng a—a neng a se na boiphihlelo ba thutabomolimo, ka bothlalo, empa a iphumanetse bopaki. A ile a kopana le Molimo, 'me a tseba hore o bitsitsoe ke Molimo. 'Me—'me ho se motho ea lokelang ho 'molella letho ka eona. O ne a khotsoe ruri hoba Molimo o sa lutse e le Molimo. Hola lefatše le ka etsa hoo feela!

³⁰ 'Me haeba sehlopha sena bosiusing bona, se lutseng mona, se ka hopola feela hore Molimo esale Molimo! O khona ho arabu nyeoeng ena joaloka ha A entse nyeoeng ea pholiso ea Khalalelo kapa ntho efe feela. E sa ntse e le Molimo. 'Me haeba re ka haha tšepo tsa rona, e seng litšepo tsa rona feela, empa mohopololo oa rōna—oa rōna o tiileng, holim'a seo A se buang! 'Me rea tseba hore Ke 'Nete.

³¹ 'Me batho ba itšoara ka mokhoa o hlollang. Ba bonahala ba lebala feela lehlakore la neketifi hoba ba fumane bonnete, hoba ke Lentsoe la Molimo. Jesu o itse, "Maholimo le lefatše li tla feta, empa Lentsoe la Ka le ke ke la hholeha." Ka baka leo haeba re tšoere Lentsoe la tšepiso, ka hona ha Le hholehe. Le ke ke la hholeha.

³² Ka hona ke—ke lumela e le sona seo litšebeletso tsa thapelo mona, e—e batho ba barapeli ba Houston, ba thahasella, maphelo a batho. 'Me re bokane mona ka morero oo, ke ho—ke ho bitsa matla a sitang melao eohle e entsoeng ke motho le matla, ntho e 'ngoe, E ka fetolang lipelo tsa batho, joaloka ha A entse ka Faro Egepeta. 'Me Ke—Ke Molimo. 'Me re tlameha ho khaotsa hona joale ho sheba—lehlakore le hanetsang, le ho ea sheba lehlakore la sebele.

³³ 'Me pele u ka ba le tumelo, u tlameha ho fumana seo u ka bang le tumelo ho sona. 'Me le ka tšepela tumelo ho eng ho feta Lentsoe la Molimo o phelang, le bopileng, matla a ea Matlaohle? Re ka beha litšepo tsa rōna holim'a eng ho fetisang? Ka baka leo e etsa hore o shebahale o fapan, o itšoere ka mokhoa o fapaneng. O shebeletse Molimo ho phetha tšepiso ea Hae. 'Me ha mathata a hlah, joaloka hona joale, Ke ankora. Ke ntho e—e u tšoarang, ntho eo u tlameletsoeng ho eona. Ke tšepiso eo re tlameletsoeng ho eona, Lentsoe la Molimo le joalo.

³⁴ Joalo feela kaha ankora e le bonnete sekepeng, nakong ea sefeso. Sekepe se ka sesa holim'a leoatle. Ankora e kantle kapele. Ke e . . . E a phomola. Lona batho ba mona Houston, haufi le leoatle, le bona likepe li kena.

³⁵ 'Me ke hobane'ng ha u jara boima boo bo feteletseng ba ankora ee e khōlōhali? Empa, le a bona, ha lifefo li fihla, e—e lifefo tse matla tse ripitlang leoatle, 'me a ka lahlela sekepe

lebopong kae-kae, 'me a se pshatla, kapa a se phethola sa ea koana metsing a sa tebang; se kena ka metsing a tebileng, le ho theola ankora ena e kholohali, e hlophiloe hoo e tla hulana botebong ba leoatle ho fihlela e hokeloq qhooeng ea mofuta ea thaba e sa bonoeng. Joale lifefo tseo li ka befa ha li batla; se na le bonneta. Ankora e tšoere nqa e 'ngoe koana, empa e—e tiile. 'Me joaloka ha sekepe le maqhubu a pheula sekepe ka mathoko, se na le bonneta, hobane se tšamiloe.

³⁶ 'Me motho o joalo ha a tlameletsoe ho Kreste le Lentsoe la Hae, le ho Le lumela. Bonneta bo teng mono, ntho e 'ngoe e mo tšoarang.

³⁷ Bonneta bo tšoana le naleli ea leboea ha u lahlehile. Ha u—ha u lahlehetsoe ke likhutlo tsa hau, 'me u batla ho fumana tsela ea hau e khutlang, naleli ea leboea ke bonneta. Joale, ho na le linaleli tse ling, empa li phethoha le lefatše. Ha lefatše le ntse le phethoha le li teetse hare, eona... le phethoha le tloha ho tsona. 'Me eona (Na le tsebile?), eona naleli ea meso ke naleli ea mantsiboea hape, hobane lefatše le sa tsoa phikoloha. Empa ho na le naleli e le 'ngoe e sa sisinyeheng, 'me e lutse bohareng ba lefatše. 'Me ka hona e... Ke e—ke naleli e tiileng. Haeba u tseba naleli ea leboea, u ka fumana tsela ea hau ka mehla. Empa, oh, ke mohla motho a lahlehileng, 'me ha a tsebe a lebe nqa efe.

³⁸ Joale, ke tseba Naleli. Oh, E feta naleli ea leboea. Le ho tlangoa le ho bona Boteng ba Hae, ho sa tsottelehe kamoo u lahlehileng kapa moo u leng teng, u ka fumana tsela ea hau e khutlang ka tataiso ea Hae, leo ke Lentsoe la Hae. Ke tsela ea ho tsoa mathateng 'ohle. Ke tsela ea khotso. Ke tsela e isang katlehong. Ke tsela e isang Bophelong, ka boeona, ke ho latela Naleli ena, Morena Jesu. 'Me joale, haeba u tlameletsoe ho Naleli eo, Moea o Halalelang ke Tšupakhutlo e tla supa Naleli feela. Ea Halalelang...

³⁹ Tšupakhutlo, e hohetsoe ho tšiea eo ea leboea. 'Me tsela e le' ngoe feela, ho sa tsottelehe hore u ka har'a meru e mekae, kapa meru e tebile hakae e u potile, kapa moholi o mokakang leoatleng, letsoho leo la tšupakhutlo, u ka le fetola kamoo u batlang, 'me le tla phikoloha hantle le supa naleli ea leboea.

⁴⁰ 'Me ha re le bothateng, le ho tšepa Kreste, ntho e 'ngoe e tiileng: Moea o Halalelang o tla re supisa Lentsoe le tla re tataisetsa ho Naleli ea Leboea, le ho lokolla sohle seo re se hlokang. Ke Bonneta ba rona.

⁴¹ Ho monna ea lahlehileng lefelleng, tšupakhutlo ke eona ntho e mo tataisetsang kantle. Ha re le bothateng, ho na le ntho e le 'ngoe feela; e tiile hakaalo ka naleli ea leboea. Ha feela lefatše le eme maemong a lona, 'me le phikoloha, naleli ea leboea e tla lula tulong tsa eona.

⁴² 'Me ha feela Bosafeleng bo le teng, Kreste e tla ba Mopholosi le kamehla, le tsela ea ho phonyoha bothata ka bong, phapang

e 'ngoe le 'ngoe, teko e 'ngoe le 'ngoe, ntho e 'ngoe le 'ngoe. 'Me ka hona re—rona, ha re tlameletsoe ho Eena, ha re ferekane le fulueha joalokaha lefatše le etsa, " 'Me, oh, re tla etsa'ng ka *sena*? Re tla etsa'ng ka *seo*?" Re bonahala re sa ankoroa. Empa monna ea ankorileng moea oa hae ka ho Kreste Jesu, tšepo ea hae mono, ho tseba hore ha a kopa Ntate eng le eng ka Lebitso la Hae, "Jesu o itse, 'Ke tla le etsa.'" Ke phetho.

⁴³ Ke—ke phetho. Ke amen. Ke bonneta. Ke makhaolakhang. Ha Jesu a ne a re, "Kopang Ntate eng le eng ka Lebitso la Ka, Ke tla le nea," joale, ao ke makhaolakhang. Ke eona. "Sohle seo u se hlokang, ha u rapela, lumela hoba u a se amohela, u tla se fumana." Ke phetho. Ke phetho, le a bona, haeba re hlile re ankoriloe 'me re E lumela, 'me re Mo entse Bonneta ba rona. Hobane, O etsa joalo. Ke Bonneta bo re tlosang tšabong eohle. Tšabo ha e eo ha u tlameletsoe ruri Lefikeng la Mengoaha.

⁴⁴ Ha ho tšabo ho mosesisi, leha sekepe se ntse se tšoenngoa ke maqhubu, ha feelsa ankora eo e ntse e tšoere qhooeng ea thaba koana. Khele, ehlile. O a tseba hore sekepe se tla tsepama. Se ke ke sa otlana khahlano le lejoe la mofuta nqa e 'ngoe. Se ke ke sa kena metsing a itseng a sa tebang le ho phetholoa, hobane se ankorile bonneta qhooeng ea thaba e itseng.

⁴⁵ 'Me ha motho a ka rapela thapelo ea tumelo, 'me a ankora moea oa hae koana Lentsoeng la Molimo, moo, "maholimo 'ohle le lefatše li tla feta, empa Lentsoe leo le ke ke la feta," tšabo ha e eo. Ba ke ba tle, ba bue seo ba se batlang. Tumelo ea rona e ho Molimo, Molimo o 'notši. Re a e lumela.

⁴⁶ Mehengl mekhoa ea litafole ea sechaba sena e ne e theiloe holim'a lentsoe la mosali. Ke lumela lebitso la hae e ne e le Emily Post. Joale, e ne e le bonneta ba maitšaro a tafole. Haeba Emily Post a re, "Nka u je linaoa tsa hau ka thipa ea hau," ke sona seo. Hmm. E ne e le eona, hobane e ne e le bonneta oa mekhoa ea tafole. Haeba a re, "Noa kofi ea hau ka pirinki ea hau, 'me u e phoke joalo ka ha u entse," ho sa tsotellehe kamoo e utloahalang e le bohlasoa, e ne e ntse e le bonneta. Motho e mong le e mong o ile a e khumamela hobane ba ile ba mo nka e le bonneta ba mekhoa ea tafole.

⁴⁷ Re loketse ho ba le bonneta ho sa tsotellehe seo re se etsang. Haeba re tla finyella letho, re tlameha ho fumana bonneta.

⁴⁸ Mehengl lentsoe la Hitler e ne e le bonneta Jeremane. Ho sa tsotellehe seo mang kapa mang a se buileng, lentsoe la Hitler e ne e le bonneta. Haeba a itse, "Ba shoa," ba shoa. Haeba a itse, "Ba phela," ba phela. 'Me haeba a itse, "Re ea ntoeng," kapa, "Ha re kene ntoeng," sohle seo re se etsang, lentsoe la hae e ne e le bonneta.

⁴⁹ Ithali e kile ea eba le bonneta. Bona e ne e le lentsoe la 'musanosi oa bona, Mussolini, seo a itseng se etsoe. Ba re mokhanni oa hae o ile a nyoloha, a fihla motsotsotso o le mong

pele ho nako, ho mo lata. O ile a mo thunya. Hobaneng? A re, "Ha ke u batle mona motsotsa o le mong pele. Ke u batla mona holim'a hlooho, ka nako hantle." Le a bona? Lentsoe la hae e ne e le bonneta. Ithali eohle e ile ea le khumamela.

⁵⁰ Ho bile le nako eo Faro, Egepete, e neng e le bonneta. Empa le a bona . . .

⁵¹ Empa liqeto tsena tsohle tseo ba li entseng e ne e le qeto e entsoeng ke motho, 'me tsohle tsa oela fatše. Hobaneng? Hobane li ne li sa lumellane le batho . . . E ne e sa lumellane le Lentsoe la Molimo bakeng sa bophelo ba motho. Ke batla seo, kea tšepa, ho ankora. Haeba re lebeletse ho pholosa bophelo ba motho, re tlameha ho tla ho latela Lentsoe la Molimo le leano la Molimo la bophelo ba motho. 'Me mokhoa o le mong ho fumana sena, ke ho e fumana Lentsoeng la Hae, le ho e lumela.

⁵² Joale, ka hona, bo-Faro bao, ke ne ke le Egepete nakoana e fetileng, 'me ke kholoa ba ne ba tlameha ho cheka maoto a mashome a mabeli fatše, ho fumana e—e tulo eo Faro a lutseng ho eona e le khosi ea lefatše.

⁵³ Le bo-Heroda ba baholo, le ba joalo, ba haola fatše ka mola, re bona moo mebuso ea bona e oeleng le ho tsoela pele.

⁵⁴ Empa o teng 'Muso o holim'a mebuso eohle. O phahame haholo maholimōng ho fihlela o ke ke oa feta le ka mohla. 'Me Morena ke Eo o lutse, hoo, ha A etsa qeto ea Hae holim'a ntho efe feela, 'me re lumela qeto eo, hoo ke bonneta. E tla ba joalo ho sa tsotelihe seo mang a se buang ka eona. Ke kamehla.

⁵⁵ Joale, Lekhotla la rona le Phahameng. Lekhotla la rona le Phahameng, ke—ke bonneta, pheletso ea liteko tsohle. Joale, re tlameha ho e fumana. Ka linako tse ling re ka tšoha re sa lumellane le qeto ea lona. Joalo, ba ne ba sa lumellane le Hitler, le joalo-joalo. Empa koana re tlameha ho fumana bonneta bona. 'Me bonneta ba sechaba le linyoe ke Lekhotla le Phahameng. Makhotla a rōna a selehae a ka leka ntho efe 'me a tlaleha *sena*, empa Lekhotla le Phahameng le e busa eohle. Re tšoanelia ho e fumana. Joaloka sechaba, re tšoanelia ho fumana qeto ea lona, hobane sechaba se tlameletsoe bonneteng bona ba Lekhotla le Phahameng. Ke hantle.

Ntho e 'ngoe le e 'ngoe e tšoanetse ho ba le bonneta.

⁵⁶ Na le ne le tseba papali ea tloaelo ea bolo e loketse ho ba le bonneta? Eya. Bonneta ba papali ea bolo ke eng? Molaolapapali. Ho ka thoeng ha molaolapapali a le sieo, le a bona, molaolapapali? Ho sa tsotelihe moo u emeng teng, malulo ao u e shebang kateng 'me u re, "E ne e le bolo," 'me a itse, "E ne e le kotlo," che, ke seo e neng e le sona, e ne e le kotlo. Hobaneng? Hobane, lentsoe la hae, ho sa tsotelihe seo li-bleachers li se buileng, seo motho e mong a se buileng, ke kotlo hobane o e bitsitse kotlo, 'me ke molaolapapali. Joale, ho ka thoeng hola molaolapapali a ne a le sieo? Ho ka hlahia khang e kaalo, le ntho

e 'ngoe le e 'ngoe e le tšenyehong, ho fihlela u sa khone ho bapala papali ea bolo. Ka baka leo, u loketse ho ba le bonnete, ho ba le papali ea bolo. E tšoanetse ho ba joalo.

⁵⁷ Joale, bonnete bo loketse ho ba teng, lebone la sephethepheth. Lebone la sephethepheth ke bonnete, ke rialo, ho sephethepheth. Ho ka thoeng haeba lebone la sephethepheth le ne le le sieo? Kapa ho ka thoeng haeba lebone la sephethepheth le ne le timile, 'me u matha u theosa ka seterata? 'Me thaka le leng le ne le etla ka *mona*, 'me a re, "Joale, ke ne ke le mona pele. Ke loketse ho qeta." E mong a re, "Ke morao mosebetsing." Le bua ka tšubuhellano ea sephethepheth, u ka ba le eona ruri. Empa, le a bona, lebone la sephethepheth le a rarolla. Ke bonnete. Haeba lebone le le tala, tsamaea. Haeba le le khubelu, ema. Haeba ntho e kang e— e lebone la sephethe-pheth e le sieo, joale re ne re tla fumana tšubuhellano ea sephethepheth.

⁵⁸ 'Me ke bona bothata ba tumelo ea Bokreste kajeno. Re fumana litšubuhellano tsa sephethepheth, motho e mong le e mong o etsa bonnete ba hae.

⁵⁹ Athé, re na le Bonnête bo le bong, 'me hoo ke Lentsoe la Molimo o phelang. Seo se e rarolla ka ho sa feleng, ho sa tsotelehe seo motho e mong a se buang.

⁶⁰ Ho batla ho fihlile mono joaloka matsatsing a Baahloli, mang le mang o na le bonnete ba hae. Empa tsohle li a hlolleha, joaloka bo-Faro le ba joalo.

⁶¹ Empa bonnete ba Molimo ke Lentsoe la Hae. O a E hlahisa, "Me maholimo le lefatše li tla feta, empa Le ke ke la feta." Ke rata seo.

⁶² Joale, ha re na nako e ngata, ka hona re shebeng feela metsotsoana e 'maloa bathong ba neng ba kene tlokotsing, le mohla lefu le neng le atametse, joaloka ha re eme bositung bona, 'me ba nka bonnete. Tloong re hlome ba bang ba bona lipotso.

⁶³ Ha re khutleleng paleng ea khale e tsebjoang ke rōna bohole, mohla sebe e neng e le qubu lefatšeng ho fihlela Molimo o kula o khathala ke sona, 'me lefatše le ne le tl'o timetsoa. 'Me Molimo oa nea Nohe bonnete, e ne e le Lentsoe la Hae. 'Me, ho sa tsotelehe, bonnete boo e ne e le ba ho pholosa batho. Nohe o tsebile lefatše le tla shoa. 'Me Molimo o mo file bonnete, 'me hoo e ne e le Lentsoe la Hae, joale, ho pholosa batho ba Hae lefung. Joale, bonnete e ne e le eng, ho pholosa batho lefung nakong ea Nohe? E ne e le Lentsoe la Molimo. E ne e le bonnete, ho sa tsotelehe seo motho a se buileng.

⁶⁴ Seo mahlale a se buileng, "Ha ho pula holimo mane. Re ka thunya khoeli ka lisebelisoa tsa rōna. Ha ho pula mono. Pula e tla theoha joang?" Ha Molimo o boletse hore pula e tla na, Molimo o ka ritela pula maholimong, haeba O boletse joalo.

⁶⁵ Nohe o ile a tsoela pele ka mosebetsi oa hae, a phutholohile, 'me a lokisa areka bakeng sa ho pholosa batho. Hoba, ho ne ho na le bonneta bo neiloeng batho, hore ba ne ba tla bolokeha haeba ba ne ba ka nka tsela e lokisitsoeng ke Molimo e le bonneta bona.

⁶⁶ Ka baka leo, ka nako tse ling, ha re se re amohetse bonneta... Ke rata ho bua sena ka baka la batsoali ba bana bana, seo ke batlang ho le bolella sona nakoaneng feela. Joale, haeba e...

⁶⁷ Ka linako tse ling, ha re e amohetse, re huleloa tekong, ho bona haeba re hlile re e lumela. Re—re... Ka tloaelo Molimo o etsa hoo. 'Me Molimo o a sebetsa...

⁶⁸ A ke ke a fetola lenaneo la Hae, hobane Lentsoe la Hae ke Eèna. "Lentsoe le ne le le tshimolohong, 'me Lentsoe le ne le le ho Molimo, 'me Lentsoe e ne e le Molimo. 'Me Lentsoe le ne le etsoe nama la aha har'a röna. Eèna maobane, kajeno, le kamehla." Ka hona, ke Molimo kamehla.

⁶⁹ Ha A biletsoa temeng, ho nka khato, le qeto eo A e etsang, O tlameha ho lula qetong eo kamehla. A ke ke a e fetola, hobane ha A fele.

⁷⁰ Joale, nka fetola qeto ea ka, le ka khona, hobane re na le pheletso. Ka baka leo, re etsa liphoso.

⁷¹ Empa Molimo o ke ke oa fetola qeto ea Oona, hobane Ke mohlokapeletso, 'me qeto ea Oona—ea Oona e phethahetse, kamehla. A ke ke a re, "Ke ne ke fositse *mona*, 'me Ke tla fetola qeto ea Ka," hoba hoo ho ne ho tla bontša hore Molimo a ka fetoha. 'Me Molimo o ke ke oa fetoha, le Lentsoe la Oona le ke ke la fetoha. O a tsoana, kamehla.

⁷² Ka baka leo, Molimo oa hulela Nohe tekong, ka mor'a ho amohela bonneta ba Hae. Nohe a kena arekeng. Molimo oa koala monyako ka mora hae. Ntle le pelaelo ba itse, "Joale, hoseng, maru a matšo a tla fihla. 'Me ho tla thoathoaretsa le lehalima, 'me lipula li tla tsholoha." Empa, le a tseba, tsatsi le hlahlamang, letsatsi le ne le chaba hantle feela kamoo le kileng la etsa kateng.

⁷³ Ke a kholoa, balumeli ba moeli ba itse, "Re tla nyoloha. Monnamoholo eo a ka be a nepile ka taba eo. Ka baka leo, mohlomong mahlale a ne a fositse, hore ho—ho ka ba le pula holimo mono." Empa, hopolang, pula e ne eso ne.

⁷⁴ Empa, eaba, tsatsing la bobeli, letsatsi le ne le khanya joaloka kamehla; la boraro, la bone, la bohlano, la botšeleta, esita le ho fihla letsatsing la bosupa. Empa Nohe o ne a hloeletse phaposing e ka holimo, a tle a khone ho boha lipakapaka. 'Me hoseng hoo ha bosupa, ha fihla nako, mohla batho ba neng ba latotse tsela ea Molimo e tiileng ea pholoho, ea ho pholosa bophelo ba batho, lipula tsa qala ho na le liseweje tsa tlala. 'Me e—e mokoroana oa qala oa phahama, 'me oa isa Nohe le

bao polokehong. Ehlide, hoba ba ne ba itšetlehile Lentsoeng la Molimo, bonneta, Lentsoe la Molimo la pallo.

⁷⁵ Ho sa tsotellehe kamoo ho bonahalang ho le hobe, le kamoo ho fifetseng, u sa ntse u lumela bonneta ba hau.

⁷⁶ Moshe, khele, eena, o ne a lekile ho pholosa bophelo ba Baheberu bao ba batho. 'Me ba batla ba fapohile hakaalo ka bokhopo, kapa ba le babe hakaalo, joaloka bana ba babeli bana re lekang ho ba pholosa bosiusing bona. E ne e le makhoa, 'me ba ba bolaea ka tšohanyetso feela, neng kapa neng ha ba batla. 'Me Moshe a utloa ka pelong ea hae hore seo ha se—se thato ea Molimo. Ka hona, a—a leka ho e sebetsa ka thuto. A leka ho e etsa ka boikitlaetso ba hae, 'me a fumana e hholehile habohloko. O entse ntho e sa lokang ka boeena, hobane o tlositse bophelo ba motho e mong. 'Me hoo ho ne ho sa loka.

⁷⁷ Eaba, o kena feelleng 'me a hlola lilemo tse mashome a mane mono. Empa, ka tsatsi le leng, o ne a alositse manku motšeо ho lehoatata, 'me Leseli la hlaha sehlahleng. 'Me eitse ha Moshe a atamela Leseli lena, Puo ea Molimo ea bua le eena ho tsoa Topallong ena ea Mollo e robetseng morao sehlahleng sena, 'me ea re, "Moshe. Moshe."

'Me a re, "Ke 'na enoa, Morena."

⁷⁸ 'Me O itse, "Rola lieta tsa hau, hoba nqalo eo u emeng ho eona e a halalela. Ke utloile mefehelo ea batho ba Ka. Ke utloile tšebeletso ea bona ea thapelo. Ke 'nile ka hopola hore Ke ba etselitse tsepiso." Khili, haeba e sa tlameha ho hotetsa lipelō tsa balumeli ba Bakreste bosiusing bona! "Ke 'na Molimo. Ke hopola Ke e tsepisitse." Kamoo Puo eo e neng e le Mangolong kateng! 'Me A re, "Moshe, Ke u romela tlase mono ho ba loela." 'Me Moshe . . .

⁷⁹ Hoba, joaloka ha ke boletse tšimolohong, ha u nka bonneta boo ba Molimo, bo u etsisa lintho tseo, be, ka linako tse ling bosoana, pontšeng ea batho. Na le ka nahana, monna ea neng a baleha Baegepeta, hoseng ho hlahlamang, ka mora ho bona bonneta bona . . .

⁸⁰ Lentsoe lena la Molimo le buile le eèna ka bopaki bo tiileng, hobane e ne e le Lentsoe. Tsepiso e ne e le teng, le netefatso ea Molimo o moholo oa popo, kamoo A entseng mohlolo ka—ka pel'a sefahleho sa Moshe, le ho supa hobane E ne e le Molimo oa popo.

⁸¹ 'Me Moshe, hoseng ho hlahlamang, a nka mosali oa hae a mo kallisa moulu, a behile e—e ngoana nokeng ea hae. 'Me a le lilemo tse mashome a robeli, matšoala a leketlile lethekeng la hae, hlooho ea hae e lefatla e phatsima, a tšoere molangoana o khopo letsohong, a theohela Egepeta, a hoeletsa ka matla kamoo a neng a khona ho tsamaea.

"U ea kae, Moshe?"

"Ke theohela Egepeta, ho ea hapa."

“Ho hapa?”

⁸² Tlhasele ea motho a le mong! Hobaneng? O ne a ena le bonneta. O ne a ena le ho hong. O ne a ena le Lentsoe la Molimo, a ka ema holim'a lona. Monna oa lillemo tse mashome a robeli, ka moulu, le ka molamu letsohong la hae. Ke phetho seo a neng a ena le sona. Joaloka monna a le mong ea futuhelang Rashiya, kajeno. Empa a theoha 'me a hapa, hobane o ne a ena le bonneta. O ne a buile le Molimo. O ne a utloile Puo ea Molimo. 'Me eëna... Taba ke hore, o e entse. Hantle. Hobaneng? Hoo ha hlola le eena matsatsi 'ohle a bophelo ba hae. E ne e le bonneta.

⁸³ Ha ho motho ea nang le tokelo ea ho hloella sefaleng, ho rera Evangelii, haese ha eena ka sebele a hatile mahlabathe ao a halalelang, moo ho se nang mohanyetsi kapa mosalumele ea ka qhelang a hlalosa matla a phahametseng tlhaho a Molimo. Jesu o ne a sa lumelle barutuo ba Hae ho rera, ho sa tsottelehe ba ne ba Mo tseba hantle hakakang; ba tšoanetse ho ea motseng oa Jerusalema, mono ba eme ho fihlela ba apesitsoe ka Matla a tsoang Holimo. Ba tšoanelia ho fumana boiphihlelo boo.

⁸⁴ Moshe, ka ho tseba hoba e ne e le moporofeta, o tsebile hoba o hlahisitsoe ka morero ona, empa kantle ho kopano eo ea seqo, Bonnete boo, ntho e 'ngoe e mo kholisitseng hore mohla a ne a theohela mono, o ne a tla etsetsa batho bana topollo. Ha a hlotse a tšoana. A theohela mono hoba a ne a tšoere bonneta, 'me a etsa hantle seo Molimo a mo laetseng ho se etsa. Tšabo e ne e le sieo pelong ea hae, mohla a ne a lahlela linoha fatše, kapa mare, 'me a fetoha noha. 'Me baipehi ba nama ba hlaha ka mofuta oa bona oa tšebeletso, 'me ba lahlela fatše 'me ba etsa ntho e tšoanang. Moshe o ne a entse hantle seo Molimo a mo laetseng ho se etsa. Ho se letho leo a tšoanelang ho le etsa haese ho ema le ho bona khanya ea Molimo. Ebe re fumana Molimo o ile oa nka noha ea hae 'me oa metsa tse ling. Ke tsela eo e etsoang ka eona. O ne a khotsue hoba Molimo o ka 'molellang ho etsa sena, o ka mo baballa maemong a mabe.

⁸⁵ Na re ke ke ra khona bosiung bona, holim'a motheo oa mohlankana eo ea fang Kreste pelo ea hae, ho ema holim'a bonneta bona, hore Molimo a ka etsa hore lintho tse sa khoneheng li etsahale! A ka fetola lipelo tsa baahloli! Hobaneng re tlolaka ka bohlaha, ka lintho tse ling? Ha re nkeng Molimo, pele. Ho e busetsa tšepisong. Molimo o e tšepisitse, hore—hore O tla e etsa.

⁸⁶ Ka hona, hopolang, kamehla Moshe e ne e le motho ea fapaneng hoba a ile a nka Lentsoe la Molimo 'me a Le lumela. 'Me o ne a na le tšepiso e netefalitsoeng ho eena.

Re ka bitsa ba bakae? Ha re na nako.

⁸⁷ Ha ke ngola lengolo, kajeno, ke ne ke ngola mona ka Daniele, kamoo e neng e le, seo e neng e le sona, e ne e le kahlolo ea lefu ho eena ho—ho rapela molimo ofe kapa ofe o sele. Empa o ne a

hokahane le Molimo, 'me a tseba hore Molimo o ne a khona ho mo hlokomela.

⁸⁸ Bana ba Baheberu, ba tla lahleloa seboping sa mollo 'me ba tla chesoa ke mocheso, ho chesa hasupa ho feta kamoo sebōpi se kileng sa chesa ka teng. Bana bao ba Baheberu ba lumetse Molimo. Ba itse, "Molimo oa rōna o khona ho re loela seboping sena." Hobaneng? Ba ne ba ena le bonnête. Ba ne ba ena le Lentsoe la Molimo.

⁸⁹ 'Me Molimo o neng o ka lopolla bana bao ba Baheberu seleng ea lefu la sebopi sa mollo, hakakang A ka lokolla moshanyana enoa oa Mojuda kantle mona, ea robetseng koana seleng ea lefu? Hakakang Eena... 'Me E sa le eena Jehova Molimo eo esale E le eena. Rona, joaloka moapostola Pauluse, re ka elelloa hore Molimo o tšoanang o a phela kajeno, "Maobane, kajeno, le kamehla ho tšoana." Ka hona, Bakreste ba ka tšoara letsoho le sa fetoheng la Molimo, 'me ba fetola maemo ohle. Thapelo e fetola lintho. Ke seo re batlang ho se etsa.

⁹⁰ Re ka bua joang ka Joshua? O tla tšela Jordane joang? Eka Molimo e ne e le monna ea mohlolo oa ntoa, hantle ka khoeeli ea 'Mesa, mohla metsi a neng a kokomohile joalo. Empa A re ho Joshua, "Nka areka 'me u tsamaee." Ke phetho seo a neng a loketse ho se etsa. 'Me Molimo oa chechisa Jordane oa hlahisa mobu o omileng, 'me ba tšela 'me ba lokolloa. Kamoo ho etsahetseng!

⁹¹ Ha ho makatse Joshua a itse, "Haele 'na le ba ntlu ea ka, re tla sebeletsa Morena."

⁹² Kamoo Davida, mopatriareka e moholo eo, kamoo re ratang ho bua ka eëna, ha re na nako, empa, 'me hangata, joaloka ha re utloile motho a bua nakoana e fetileng ka Davida le ka sebe sa hae, empa mohla, tseo tsohle li tšoaretsoeng, mohla a eang ntoeng, 'me re e bitsa lefatšeng, "e ne e kentse leoto khamelong," 'me sera se le seholo, 'me Davida a robetse mono tlasa sefate, 'me a fufuletsoe, ho fihlela a utloa molumo o feta har'a lihlahlha tsa monokotšoai, joale ho ne ho fapané. Davida a ema 'me a tsoelapele, hobane a ne a ena le bonnête, hore o tsebile e ne e le Molimo o mo etellang pele.

⁹³ Na re ke ke ra rapela thapelo ea tumelo e tla romela Molimo botong eo ea parole tlase mono? Ehlide, re ka khona. Re lumela re ka khona, ha re ka itšoarella bonneteng boo.

⁹⁴ "Kamoo Abrahama a bitsitseng lintho, tse neng li le sieo, joaloka hoja li ne li le teng," hobane o ne a tšoere tšepiso e tiileng e tsoang ho Molimo, hore Molimo o tla mo nea oa hae... oa mo nea ngoana ka Sara. 'Me mohla a leng lekholo la lilemo, kapa eëna, 'me eëna a le mashome a robong, "Le joale ha a ka a sisinyeha tšepisong ea Molimo ka ho se lumele, empa o ne a le matla, a ntse a rorisa Molimo." 'Me re ipitsa bana ba Abrahama. Athé Abrahama...

⁹⁵ Athé, re bile le Bibele e ngotsoeng ho tloha mehleng ea Abrahama, le lipaki tsohle tseo re bileng le tsona morao, hore Jehova o boloka Lentsoe la Hae, hore Kreste ke Mora oa Molimo. Ke 'Muelli lipakeng tsa motho le Molimo, 'me ha ho 'muelli e mong ka ntle ho Eèna. Le ho tsepisa, "Ha le kopa Ntate eng le eng ka Lebitso la Ka, le tla e neoa." "Me re ipolela hore re bana ba Abrahama. Athé, "Abrahama o bitsitse lintho, tse neng li le teng, eka hoja li le sieo, hobane o lumetse Molimo." Ruri. Ke e lumela ka pelō ea ka eohle.

Bophelo ba Pauluse boo Kreste e leng setsi e ne e le bonnête ba hae. Bo ile ba mo tlama.

⁹⁶ Kreste e ne e le bonnête ba tsoho, joaloka ha re bala mona. O itse, "Molimo o hlapantse ka kano, ho Davida, hore A ke ke a lesa moea oa Hae liheleng." Kano ke qetello ea ntoa eohle. "'Me O hlapantse hore O ke ke oa lesa moea oa Hae liheleng, empa o tla Mo tsosa." 'Me eaba O tsepia Molimo, 'me a thakhisoa; a shoa, a tsoha hape, a nyolohela Leholumöng, hobane O lumetse Molimo.

⁹⁷ Ke hakakang, joalo ka ha A entse mohlala, re ka nkang bonnête! Haeba Kreste a ne a ka e nka, holim'a tsepiso e le 'ngoe mono, hakakang re ka e nka, ka likete tsa litsepiso! Le ka Mali a Jesu Kreste mono ho hloekisa tsela ea rôna, le ho re tselisa khohlo e khôlô eo ea sebe e re arotseng, ka ho se lumele, hole le Molimo, le ho re kenya hantle ka pel'a Sefahleho sa Hae, ho bua le Eèna, e ne e ka fetisa hakakang! Ee. Re loketse ho ba le bonnête.

⁹⁸ Ke nahanne ka bo bong hona joale, ha ke koala, e ka ba George Washington, mohla Amerika e sa leng nyenyane 'me re loanela bophelo, bophelo ba sechaba se seholo sena seo re nang le sona. George Washington e ne e le Mokreste. E ne e le molumeli. 'Me tlase Valley Forge, ke bolelloa hore masole a Amerika, e ka ba feela 'ngoe-tharong ea bona, ba roetseng lieta. 'Me mariha ho ne ho bata, 'me boemo ba leholimo e le noto, 'me noka e ne e hoamme e ntse e phalla. 'Me Borithani ka lehlakoreng lane. 'Me bophelo ba sechaba sena bo ne bo atametse.

⁹⁹ O ile a etsa'ng? E ne e le Mokreste. O tsoa nakong ea bosiu 'me o khumama fatše hara lehloa, 'me a rapela ho fihlela a kolobile ke metsi a lehloa thekeng la hae. 'Me a lula mono 'me a rapela ho fihlela a fumane bonnête, karabo e tsoang ho Molimo, hore Molimo o tla mo fa tlholo.

¹⁰⁰ 'Me tsatsi le hlahlamang, Valley Forge e ne e se letho ho eena. A tselá Delaware, ba fohla lehloa kamasole a sa aparang ka bottlalo, a batla a hoamme, maoto a bona a sa roala letho fatše, lehloeng. 'Me a e nka, mohla likulo tse tharo tsa sethunya li fetang hara jase ea hae. Hobaneng? O ne a tsepile bonnête ba thapelo e arabetsoeng. Amen. Eona metheo eo sechaba sa rona se theiloe holim'a ntho e joalo.

¹⁰¹ Ho etsahala'ng ka batho ba ipolelang hore ke Bakreste kajeno? Hobaneng re khathatsehile horen e kang ena? Re se khathatsehe. Re mpe re be masole. E, monghalii.

¹⁰² A rapela ho fihlela a fumane karabo eo. Joale, ho se noka e koahetsoeng ke maru, ho se masole a sa roaloang lieta, ho sa tsotellehe maemo, ba ne ba ka e nka hobane Molimo o ne a boletse joalo. Kulo ha ea khona le ho mo bolaea, sethunya sa sera. Ruri. Hobaneng? O ne a tšoere tšebeletso ea thapelo. O fumane karabo.

¹⁰³ Ho bile monate hakakang bosiu bo bong, mohla Moapostola Petrose a neng a le ka chankaneng, 'me ba ne tla mo bolaea hoseng ho hlahlamang. O ne a tla shoa tlas'a kahlolo ea lefu, joaloka ha Mojuda enoa e monyenyan a tla etsa joale. Empa ba ile ba etsa'ng? Ba entse ntho e tšoanang le eo rona mona Houston re lekang ho e etsa. Ba rala tšebeletso ea thapelo tlung ea Johanne Mareka. Eare ba sa rapela, Lengeloi la Morena la ea chankaneng, la bula mekoallo ea chankana, 'me la bula menyako. 'Me ka nqane ho moo, la ntša Petrose, 'me a theohela hantle kopanong ea thapelo.

¹⁰⁴ Ke a lumela, bosius bona, hore 'ona Molimo oo o a phela. Haeba E se Molimo o le mong, joale phoso phoso e teng. Ka sebele.

¹⁰⁵ E entsoe ke'ng? Ka tšebeletso ea thapelo, ka Bakreste ba tšepehang ba lumetseng, 'me ba lumela hore Molimo o tla lopolla moena bona kahlolong ea lefu. E ne e le Bakreste ba ileng ba lula bosiu bohole 'me ba inama ka lifahleho tsa bona, 'me ba hooeletsa 'me ba rapela.

¹⁰⁶ Joaloka ha ke utloile e mong oa bareri, nakoana e fetileng, a re o tla hooeletsa, bosius bohole. Bothata ba eona, kajeno, ke hore batho ba tèla. Ba khathala, ba otsela. Ba batla ba sa khone le ho hlophisa tšebeletso ea metsotsos e leshome. Be, ke—ke ntho e phoso.

¹⁰⁷ Haebe u rata Molimo, be, re tlameha ho ba maphathephate. E tšoanetse e be litšepo tsa rōna—tsa rōna, litakatso tsa rōna. E loketse joalo. Ntho e 'ngoe le e 'ngoe e ka ho rona e loketse ho kena leratong la Kreste. Amen. Re lutse re le botsoa haholo. Re lutse re sa khathale hakana, athe lefatše le eshoa tlas'a maoto a rona. Ke hantle. Bophelo ba batho bo a tsoa, ntle le Molimo, 'me re lutse tjena—tjena re sa e tsotelle. Ha feela re le litho tsa kereke, ke phetho seo re se nahananang se etsa phapang.

¹⁰⁸ Ke ne ke bua ka ho Tla ha Kreste, liveke tse 'maloa tse fetileng, kerekeng e itseng. 'Me ka mor'a moo ho ile ha ba le motho a kopanang le 'na ka kamorao ho kereke, 'me a re, "Moena Branham, u tšosa batho ho isa lefung."

Ka re, "Hobaneng ke etsa hoo?"

¹⁰⁹ A re, “Be, u bua ka ho Khutla ha Kreste. Ha ke batle ho utloa lintho tse kang tseo. Ke na le moshanyana mona eo ke lokelang ho mo holisa. Ke na le ngoanana sekolong.”

¹¹⁰ “Oh,” ke itse, “ho Tla ha Kreste ke ntho e khanyang ka ho fetisisa eo nka e nahanang.” Ruri. Le a bona?

¹¹¹ Bibele e boletse, “Bohole ba *ratang* ho lhaha ha Hae.” Oh, khili, ka letsatsi leo mohla ho shoang hona ha khale ho tla apara ho sa shoeng, le sena—ntlu ena ea maloetse e senyang eo ke phelang ho eona e tla fetoha, ka motsotsoana, ka ho panya ha leihlo, le ‘mele o kang ‘mele oa Hae ka Sebele o khanyang! E loketse ho ba takatso ea pelo ea Kereke. Eka khona e be monna e mong le e mong le mosali, ba tukang mollo, ba rera literateng le hohle, ho leka ho pholosa meeaa. Ruri.

¹¹² Kea ipotsa haeba re hlile re tlameletsoe bonneteng boo re itlalehang bona. Na re shebile naleli ea meso e lokileng? Haeba re tsepetsese kerekeng ea rona le phuthehong ea rona ea bolumeli, boikamahanyo ba rona; ha lefatše le ntse le fetoha, le fetoha le seo, ho potoloha le ho potoloha.

¹¹³ Empa ho na le Naleli e le ‘ngoe e sa fetoheng. Ho na le ntho e le ‘ngoe e ke keng ea fetoha, ke Molimo. Molimo o ke ke oa fetoha. Lentsoe la Oona le ke ke la fetoha. Bibele ea Oona e ke ke ea fetoha. ‘Me ha motho a tsoetsoe ke Moea oa Molimo, Kreste a le ka ho eena, e thasisetsa tsepiso ka ‘ngoe ka “amen.” Ke hantle. Ruri.

¹¹⁴ Oh, ehlide, re hloka kopano ea thapelo. Re tsoanetse ho ba Bakreste. Bakreste bohole ba tsoanetse ho sebelisa Bonneta bona boo, Lentsoe la Molimo. Lentsoe la Molimo ke tsetleli ea Mokreste.

¹¹⁵ Jesu o boletse, Lentsoeng la Hae, “Ekare ha le lula ho ‘Na, Mantsoe a Ka a lula ho lona, le ka kopa seo le se batlang, ‘me u tla e etsetsoa.” E nahaneng. U ka batla bonneta bofe bo fetang moo? U ka itsepisa eng ho feta ntho e kang eo? “Ekare ha le lula ho ‘Na, Mantsoe a Ka a lula ho lona, le ka kopa seo le se batlang.”

¹¹⁶ Ho kopa Molimo ho sebetsa pelong ea moahloli eo, kapa lekhotla leo la parole, le ho ntša thaka leo seleng eo ea lefu, haeba re e kopa ka tumelo, ho lumela, likopanong tsena tsa thapelo, re tla e fumana. Hoo, ke lumela Molimo joalo feela.

¹¹⁷ ‘Me tumelo ea ka eo ke nang le eona ho Molimo, ke ka hona ke leng mona bosius bona. Ke ka hona ke hlakotseng ntho e ‘ngoe, ‘me ka kena ka mona. Ke tlameha ho khanna makholo a limaele bosiung bona, ho khutlela Tucson, Arizona, hobane ke tlie ho teanya tumelo ea ka le ea lona. Eo ke monna. Ke moea o robetseng koana. Ke motho ea hlokang. ‘Me rōna Bakreste re tlameha ho phaphama nqa bonneta, ba tumelo ea sebele, ea mankhonthe, ho e tlamella Lentsoeng la Molimo, le ho rapelisisa tsepiso eo. E, monghali. Oh, khili! “Ekare ha le lula ho ‘Na, le Lentsoe la Ka ho lona, kopang seo le se batlang.”

¹¹⁸ 'Me hape, "Ekare ha batho ba bitsoang ka Lebitso la Ka ba phutheha 'moho ba rapela, Ke tla utloa ke le Leholidōng." Tšebeletso ea thapelo, ke eona.

¹¹⁹ Ke lumela ho qoqa le babuelli ba molao le ho bua le maqoetha, kapa baahloli, kapa makhotla a parole, kapa eng feela. Hoo ho itoketse. Empa, moena, ha tšepo ea hau e sa tlamelloa nthong e 'ngoe haese ea kelello ea nama, kapa, kelello ea batho, ke rialo, ruri le tla soaba.

¹²⁰ Empa ha u khona ho tlamella tumelo ea hau moo u tsebang, le ho lula mono le ho rapela hofihlela Molimo a arabela, 'me u a tseba hore u e fumane pelong ea hau, ntho e 'ngoe e tla etsahala.

¹²¹ Ke bone bafu ba tsoha tlung ea lepat. Ke bone e—e mahlo a foufetseng a tutuboloha, litsebe tse thibanol li thiboloha. Ke bone mafu a mofetše, mofetše oa sarcoma, lepera, a folisitsoe ke matla a Molimo o Matlaohile. Hobane, ba ne ba e-na le tumelo ea ho lumela hore Molimo, O entseng tšepiso, o tla khona ho boloka tšepiso ea Oona. Seo ke 'nete, tumelo ea 'nete joaloka Abrahama.

¹²² Itlamelle mono. Lula mono u rapele. E seng ho theoha feela, le, "Molimo, lokolla mothoana oa batho le ho mo isa hae." Bohle re ka rata hoo. Empa a re luleng mono ho fihlela ntho e 'ngoe e etsahala. Oh! Ha ntho e etsahetse, ke hona, kholiso eo e ka oela har'a sehlotšoana sena sa batho se lutseng ka hara odotoriamo ena mona bosius bona, e ka oela hara rona hantle mona, tumelo e lekaneng le matla a Molimo, ha re ka rapela ho fihlela, ho fihlela re thula thapo eo ea tlholo, ho fihlela bonneta boo bo theoha, eona Topallo ea Mollo e thisitsoeng mona Houston, ka khamera ea Ted Kipperman, lilemo tse leshome le metso e 'meli tse fetileng. O teng mona bosius bona, ka boholo ba Hae joaloka mohlang oo, ho loela moshanyana eo, ha re ka e lumela feela, hobane esale Eèna maobane, kajeno, le kamehla. Ke e lumela ka pelö ea ka eohle. Lebaka leo ke leng mona ho hlahisa thapelo ea ka le lôna bohole hore Molimo o tla baballa bophelo ba bona.

¹²³ Ka hona ha u rapelisia, ho fihlela u fumana karabo, u fumane tiisetso, joaloka Washington, joaloka Johanne Mareka, joaloka Daniele, joaloka Moshe, ho fihlela u fumane bonneta, ntho eo u tsebang hore u ka ankora ho eona, ke hona, "Holim'a bonneta bona Ke tla haha Kereke ea Ka," 'me makhotla 'ohle a naha a ke ke a hanelia Hoo. Ke hantle. Holim'a Hoo!

¹²⁴ Oona Molimo o nong o ka nka Mojuda ea nko e porometseng joaloka Pauluse, mabifi le ho theohela mono ho bolaea Bakreste bohole tlas'a kahlolo ea lefu, 'me a ka mo fetola le ho mo etsa Mokreste ea ratehang, 'ona Molimo oo o phela bosius bona, o ka fetolela molao ho mohau, neng kapa neng ha O hopola ho e etsa. Alleluia! Ke tla bitsoa mohalaleli-mothethehi, leha ho le joalo, nka mpa ka qala ka eona hona joale. Ke lumela Molimo oo. Amen. E, monghali.

¹²⁵ Hape Mareka 11:22, mohla le rapetseng kahohle. O itse, “Kannete, nete, Ke re ho lona, e bang le tumelo ho Molimo. Ke re ho lona, ha le ka re ho thaba ena, ‘Sutha.’” Ha bonneta boo bo u fihlela, ha u tlotsitsoe ka Moea oo o fetelang ka nqane ho taolo eohle ea mahlale ka ntle koana, le pele ho hlaho atomo kapa molekule, Eo ea bopileng ntho e ‘ngoe’ le e ‘ngoe’ ka polelo, ‘me ha moea oa hau o ankora ho seo, ha ho letho le ka e thibelang. Ke hantle. “Ho re ho thaba ena, ‘Sutha,’ ‘me u sa belaele pelöng ea hau, empa u lumela hob seo u se buileng se tla etsahala, u ka fumana seo u se boletseng.” Haeba hoo e se bonneta ho itšoarella teng! Ruri, ke eona. Ke hantle, bonneta.

¹²⁶ Joale, sechaba se na le bonneta. Bophelo ba hau ba lelapa bo na le bonneta. Hohle, haeba e ka fihlela letho, e tlameha ho ba le bonneta.

¹²⁷ Re ananela leqoetha lena. Rea ananela, oh, banna bohole. Moruti enoa ea khabane mona ea tsoang California, ‘me ke molaetsa o babatsehang hakakang! Le—le moena oa rōna ea lekileng ho nka chelete le ntho eohle, ho leka ho thusa mosali enoa ea futsanehileng, le—le bana ba hae, ho ba lopolla. Hoo ho itoketse. Re ananela seo, ‘me kea e emela.

¹²⁸ Empa ntho e ‘ngoe’ e teng mose oane, metsoalle, ha re koala kopano ena bosiung bona: Re tšoanetse ho e tlamella bonneteng, tšebeletsong ea thapelo pel’ a Molimo, e tla romela tokolohno ho tsoa ho Jehova Molimo o tšoanang. Esale Molimo hakaalo bosiung bona joaloka ha O entse mohlang oo. Alleluia! Lea e lumela na?

¹²⁹ Ha re emeng ka maoto a rona, ke hona, ‘me bosiung bona re bope tšebeletso ea thapelo ka mona, ho fihlela bonneta bo etsahala. Phahamisang matsoho a lona pel’ a Molimo. Rapelang ho fihlela e otla botsekeng, ho fihlela bonneta bo oela pelong tsa lona.

¹³⁰ Morena Molimo, theola Moea oa Hau o Halalelang, le ho romela le ho lokolla bana bao koana, Morena. Ba lutse linqalong tsa meriti ea lefu. Ntho e ‘ngoe’ e mothating oa ho etsahala, Morena, ‘me re rapella hore litšebeletso tsena tsa thapelo li tukise Mollo. Kea U lumela, Morena. Kea e amohela, ‘me kea lumela U tla lopolla bana bao. Aba sena, Molimo o Matlaohle. Rona, Kereke ea Hau, ho e kopa, ka Jesu Kreste. Amen. 

63-0304 Bonneter
City Auditorium
Houston, Texas U.S.A.

SOUTH SOTHO

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintara ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lissele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org